



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :



Tir Yimyim



tir_yimyim



tir yimyim

TAPAK 7

Omar-i aniba cabinet-i J&K state jenjang atema bangzüng ka agizük

Sinwar asüba ya Hamas asoshi takoksa tulu, saka rara atemba masü

VOL. XXII ISSUE NO. 10 (ADOK 10)

DIMAPUR

KÜPTOKNÜ (SATURDAY)

MONGPUTENI (OCTOBER) 19, 2024

₹ 5.00

VK Area nung tashiyim agi sen saruba noktanger

Dimapur, October 18, 2024 (TYO): National Highway 2 (NH 2) nung tashiyim agi sen saruba aser ozüngi memelaba tax agiba anema Zunheboto district kübok VK temeket nung telok kari bangzüng ka renemogo.

Iba khuret atema October 14 nü VK HQ town hall nung VK Area GB's Association, VK Range Students' Union, VK Area Peoples Organisation aser public lennirtem senden ka amen.

Idangji NH-2 nung Doyang nungi Izheto village tashi kilometre 20 nung telungpur telok balalai tashiyim agi sen saruba aser ozüng alema tax meshiba ajak noktangtsü lemtetogo.

Iba lemtet anema inyakertem merenshitsu anungji telungpur teloktemi NH-2 nung ibala mapa meinyaktsü mepishia metetdaksür ta civil society organizations-i ashi.

"Tashi mangartem den onoki amalitep malitsü aser külemi lemtetem agia mapa inyaktsü. Iba tesem nung ozüng alema inyakshiba noktangtsü atema onoki administration aser police department den külemi yariteptsü" ta parnoki metetdaksüogo.

Iba lenmang nung lendong, koda masüba, amokmerenba mesüra kija/teloktem nungi timtem kar ajurura tsünglanglen agüja aliba nisungtem den tongrateptsü akok ta VK area nung CSOs-isa ashi.

Helpline Numbers:

Extra Assistant Commissioner VK: 8414085073

OC, VK Police Station: 8974870646

President, GB's Association VK: 9862577181

President, APO VK: 8837247820

President, VKRSU: 8415848384

Nagaland TB Forum-i social movement ayongzüker



Kohima, October 18, 2024 (TYO): India nung Tuberculosis (TB) agientsü ta ser inyaka arur joko küm ka shi dang anünga lir aser iba dak sendakba nung tanü Nagaland State TB Forum senden ka amendang social movement ka inyaktsü ayongzüko.

TB Free India nung Nagaland adentsü atema iba mapa inyaktsü ta Nagaland State TB Forum-i ashi.

India-i 2025 tashi nung End TB alizüng yur inyaka arur aser iba ya global Sustainable Development Goal (SDG) target matongdang küm 5 jelia inyaktsüba lir.

Health & Family Welfare Commissioner & Secretary Anoop Khinchi menden ser State TB Forum senden nung State TB Cell officers aser NGOs aden.

Parnoki TB testing (Relocation/Decentralization of health and wellness centers); Pradhan Mantri TB Mukta Bharat Abhiyan; Advocacy Communication & Social Mobilization; Shorter TPT regimen & Cy-TB aser TB Mukta Panchayat benoka lemsatöp.

Parnoki TB agi shirangertem balaka mebeshitsü atema osang prokshitsü aser TB nungi taneptsü angurtemi TB

champions ama awareness camps ayonga agitsü lemtet.

"State TB Forum nem tebilemtsü khuret tulu ka agüja lir anungji asenok ajak longjemer iba alizüng atongtsüla aser Nagaland nungi TB samatsütsüla" ta Anoop Khinchi-i ashi.

Pei pei district TB cell-i district MLA tem den ajurutepa TB Mukta Bharat Abhiyan nung shilem agidaksütsüla aser department-i TB ya taneptsü anguba tashidak ta osang prokshiba nung yariteptsüla ta paisa ashi.

"Nagaland nung TB drug anünga mali anungji District TB Cells-i angati TB treatment aser angati mozü agütsütsü mepishir" ta National TB Elimination Programme (NTEP) atema State TB Officer Dr Vezokholu Theyo-ia ashi.

"World TB Day 2024 mapang Nagaland nung yimtsüng 78 tashi TB Free ta sangdongogo. District ajak nung tamangba yimsü lennirtem den awareness meetings agiogo" ta IEC Officer (NTEP) Thungchanbeni M. Humtsoe-ia metetdaksü.

Districts NTEP staff-i Village Health Nutrition Day nung shilem agir aser TB atema screening aser testing mapa inyaka arudar ta lai ashi.

NTEP atema TB Champions 22 nem taküm training agütsüogo aser HWCs nung nisung 56 training agütsüogo ta Thungchanbeni-isa ashi.

TB Patients (Pradhan Mantri TB Mukta Bharat Abhiyan) atema Community Support nung individual donors 347, NGOs 14, MLA 2, corporate 1 aser Nishay Mitras 21 lir ta laisa ashi.

Nagaland Governor La Ganesan-i Longleng semdang



Dimapur, October 18, 2024 (TYO): Nagaland Governor La Ganesan-i October 18, 2024 nü Longleng district semdang aser DPDB Hall, Longleng nung sentong ka agia liasü.

Sorkari state nung terenlok bener arutsü meranger aser senso shia renloksü, azükarutsü aser tiptema alitsüsa mapa inyaker, ta Governor Ganesan-i ashi.

Pai health, water, sanitation, roads aser banking nung ajemdaker jembidang item maparen atema külemi longjemer

inyaktsüla ta ashi. Sensotem anema ali nung dang lokti ka tejakleni aotsü anungji healthcare facilities tajungba kümdaktsütsü merangtsüla ta Ganesan-i ashi.

Paisa bangdak department dang Jal Jeevan Mission amala scheme tem inyaktsü ayongzüker.

"Terenlok atema senzüsönong tajung alitsüla aser rongsenketzüng renloksü atema banking services tajung alitsüla anungji ozüng sülen anidakba sensotem ama nenoki Centre aser state nung sorkartem den

amalitepa inyakshangshitsü ayongzüker" ta Governor Ganesan-i ashi.

Iba sentong nung Longleng Deputy Commissioner Manpai Phom menden liasü aser pai tesentepertem ajak pelaa agizük.

Sentong nung Education Department, Public Work Department (R&B), SBI branch Longleng, Medical Department aser PHED ketdangsurtemi parnok maparen indang osang tatsütsü lemsatöpa liasü aser Phom People's Council President-ia o tatsüka jembü.

Manipur BJP MLA temi CM Biren Singh agientsü akhanger

Guwahati, October 18, 2024 (Agencies): Manipur nung Bharatiya Janata Party (BJP) MLA 19-i Chief Minister N Biren Singh mapa nungi anenjang ta Prime Minister Narendra Modi dangi shidi ka züluogo.

Shidi zülurtem rongnung Assembly Speaker Thokchom Satyavrat Singh, Minister Thongam Vishwajit Singh aser Yumnam Khemchand Singh nung dena lir.

Delhi nung Manipur nungi Meitei, Kuki aser Naga MLA tem külemi ajurutepa ajanga state BJP nung telemsa adoka aliba sayuogo.

Manipur BJP MLA temi züluba shidi nungsa BJP-i aniba sorkari yimjung bener marutetba aser tensa mazüoktetba shia lir.

MLA temisa Manipur aser BJP kümzüka ayutsü anungji Chief Minister Biren Singh agien nung dang kin o kin tsüngda mangatetep atema mapa

inyaktetsü ta shidi nung shiogo.

Manipur nung security forces mapa lemsatöpa kija agi dangbo khuret mekottetsü aser state o linük atema tenüng menük ang tuluba bentsür arutsü ta BJP MLA temisa ashi.

Olemtep melitetsüsa tenokdangba alibatem asadangtsüla aser olemtepa otetsüsa tensa ka bener arutsüla ta Manipur BJP MLA temisa Prime Minister dang shiogo.

Nagaland nung National Highways tajungba akümtsü meranger

Dimapur, October 18, 2024 (TYO): Deputy Chief Minister aser Planning & Transformation and National Highway Minister In charge T.R Zeliang-i October 16, 2024 nü Nagaland nung National Highway dak sendakba onüktem atema senden ka ayonga menogo.

Nagaland Civil Secretariat Conference Hall nung amenba senden nung Ministry of Road Transport & National Highway ajanga Nagaland nung NH projects inyakba atema tajitetba kar lemsatöpa benoka jembü.

Iba dak sendakba nung Union Minister Nitin Gadkari-i October 21-22, 2024 anogotem New Delhi nung senden ka ayonga lir.

Tanü senden nungsa September 11, 2024 nü 25 buba Hornbill Festival atema road sector dak sendakba department tem indang onüktem jembiba meyipa repringshio.

"Benjung mapang lenmang ajak nung aser talisa NH-29 nung traffic tiptema senzüsüla

kechiyong tourists aser tongtipang nisungtem iba lenmang nung teiomba senzüsü" ta Deputy CM TR Zeliang-i ashi.

September 11 nü senden nung NHIDCL aser NH (NPWD)-i NH-29 nung tesem kar nung mapa renemtsü jembiba ama meinyaktetsü ta ashi. Tzünglu kanga aruba ajanga mapa shitak meinyakteter ta ketdangsurtemi ashi.

Ajisüaka Deputy Chief Minister aser Commissioner & Secretary Works and Housing naprongi anogo züngzüksüba memelenshitsu ta metetdaksü.

Iba atema NHIDCL aser NH (NPWD) dang mapa tuluba meranga inyaktsü aser October tatemlen tashi nung mapa renemtsü tetuyuba agütsüogo.

Nagaland nung Hornbill festival küm 25 ajungba amongtsüba lir aser local o foreign tourist aika arutsüba lir anungji parnok anentsüh aser tanga timtem kecha melii Naga Heritage village atongtsüla ta

NHIDCL aser NH (NPWD) ketdangsurtem dang metetdaksüogo.

Tanü Works & Housing Department-ia department ajak dang pei pei telongtet nung maintenance & repair works inyaktsü shidi ka ajanga metetdaksüogo. Maneni, R&B (NPWD)-ia bypass roads ajak tiptema ayutsü tetuyuba agütsü.

Senden nungsa Land Act benoka lemsatöpdang Commissioner & Secretary Land Revenue dang NH-202 ajanga süba district ajak nung land rates agütsütsü tetuyuba agütsü.

State sorkari land rates agizükba sülen DPR nung enoksemtsü aser Ministry dangi abentsü ta senden nungsa jembü.

Tanü senden nung Com & Secy. Kesonyu Yhome, IAS W&H, Com & Secy. Dr. Zasekuolie Chusi, NHIDCL ED(P) Kohima, RP Singh, Chief Engineer NH(NPWD) MZ Akho aser tanga ketdangsurtem aden.

KMC-i mürekmejur atema workshop ayongzük



NAMASTE Scheme kübok Super Market Complex, Kohima nung October 18, 2024 nü Prevention of Hazardous Cleaning of Sewers and Septic Tanks indang workshop ka ayongzükba noksa nung angur.

Dimapur, Mongputeni/Oct. 18 (TYO): Kohima Municipal Council (KMC) ajanga NAMASTE Scheme kübok Prevention of Hazardous Cleaning of Sewers and Septic Tanks indang workshop ka October 18, 2024 nü Super Market Complex, Kohima nung ayongzükba liasü.

Iba sentong ya manual scavenging nung lendong aliba indang angatetdaksütsü aser temelen tajungba aser machine amshiba yimya sübadaksütsü nükjidong nung ayongzük.

Iba workshop nung shisalen sayur ya Core Skill Tech Solutions LLP, Delhi nungi Sanjay Paul liasü. Pai sentong tenzükba video presentation ka sayu aser iba sülen Manual Scavenging Act 2013 indang PowerPoint presentation ka agüja liasü, koba ajanga India

nung manual scavenging nokdang. Pai iba Act kübok özüng aser temerenshi indang rateta ashi aser manual scavenging yimya balala, Emergency Response Sanitation Units (ERSUs) tentetba aser kilentzü lenmang mürekba yimyatem rasaa ashi.

Pai NAMASTE Scheme indang nükjidong rateta ashidang iba scheme ya lendong aketba yimya amshia kilentzü aoba lenmang tem mürekba melen mechanized systems amshitsü nükjidong nung lir ta ashi.

Iba scheme yagi kilentzü aoba lenmang aser septic tank müreker ajangzüktsü asoshi profiling, safety kits aser lendong nungi kumzüktsü mera balala agütsür.

Paul-i jelia yongi kumzükba

ayutsü tongtipang lir ta ashi aser sanitation workers atema Personal Protective Equipment (PPE) aser safety devices tem amshia sayu.

Iba den külemi pai sanitation workers dang Swachhata Udyami Yojana densema loan scheme balala agütsüba indang rateta ashi, koba ajanga sanitation machinery alitsü atema senotsü teyari agütsüba aser NSKFDC kübok loan agütsüba indang rasaa shia liasü.

Iba sentong tenzükba KMC indang CEO Lanusenla Longkumer-i pela agizükba o jembidang NAMASTE Scheme indang nükjidonga lemsatapa liasü.

KMC indang CI, Neilhoughphrelie-i melepzüng o jembia iba workshop tembanga liasü.

Sub-Treasury Officer Tseminyu-i metetdaksür

Dimapur, Mongputeni/Oct. 18 (TYO): Sub-Treasury, Tseminyu nungi pension agizüker pensioner ajunga atema 2024 küm atema Annual Physical Verification maparen November 4-8, 2024 anogotem inyaksü, ta Sub-Treasury Officer, Tseminyu sangdong ka ajanga ashi.

Mapang ya anepdang 10:00 ako nungi nikongdang 4:00 ako tashi alitsü.

Physical verification mapang PPO Book, Verification Certificate aser Pensioners' Association ajanga agütsüba ID card bener arutsüla.

Verification Certificate ya

Pension section nung October 15, 2024 nü nungi agütsütar.

Pensioner ajak PPO Book Serial Number nung aliba ama lemsükja aliba anogo nung Sub-Treasury dangi arutsü metetdaksür, ta ashi.

Temang manemba ajanga mesenzütetsüsa lira parnok aliba ki address den contact

number tem agütsütsüla, kechiaser kuli jangjatsü atema ketdangsürtem yoktsü.

Lemzükja aliba anogotem dak alaka mapang matsülangtsü aser tsüngtong arua mejangjaba pensioner nem October 2024 nungi pension sen magütsütsü, ta sangdong ajangasa ashi.

Anogo telemsa yamai alitsü:

SI/No.	Type of Pension	Allotted Date of Verification	Pensioners' Serial Numbers
1	FAMILY PENSIONERS	04/11/2024	1 TO 160
2	FAMILY PENSIONERS	05/11/2024	161 TO 318
3	LIFE PENSIONERS	06/11/2024	1 TO 155
4	LIFE PENSIONERS	07/11/2024	156 TO 310
5	LIFE PENSIONERS	08/11/2024	311 TO 460

Chessore nung mapang liwar ayokba osettem apu

Dimapur, Mongputeni/Oct. 18 (TYO): District Administration, Chessore Town Students' Union, Chessore Town Public Forum aser Police tem lungjemer October 17, 2024 nü ajungbena Chessore Town nung dokan tem meita oa liwar aliba osettem pua liasü.

Iba mapang parnoki shishilempar dang tarutsü nung kasa yimya mamshitsü tekumdangtsü ashi aser mapang liwar aliba, nokdanga aliba oset, özüng agi memelaba osettsüset dokan/kidang mayoktsü metetdaksü.

Parnokisa özüng alema shishilempar nem tatok

magütsütsü aser aibelener nem özüng agi mela aliba ama temerenshi agütsütsü ashi.

Parnoki jila nung aliba nüburtem dang özüng alema shishilempaba metetra District Administration mesüra jila nung aliba NGOs tem nem osang agütsütsü ayongzükba liasü.

Kohima South Treasury nung pensioner jangjashitsü

Dimapur, Mongputeni/Oct. 18 (TYO): Senior Treasury Officer, Kohima South Treasury Office nungi Life aser Family pensioner ajung dang 2024-2025 atema Annual Physical Verification ya November 11-14, 2024 aser November 18-22, 2024 anogotem South Treasury

Office nung office mapang alitsü, ta metetdaksüogo. Pensioner ajak PPO Book, Renewed NPA ID card aser Treasury Office ajanga agütsüba Life Certificate tem bener tsüngtong arutsüla. Aser yamaji meinyaker nem tarutsü nung pension agütsüba anentsü, ta sangdong ajanga ashi.

Peren district nung Oct. 21 nü lokti nübuttsük alitsü

Dimapur, Mongputeni/Oct. 18 (TYO): Home Department ajanga sangdonga aliba ama aser state nung aliba district ajunga nung lokti nübuttsü alitsü Cabinet senden nung lemtetba ama Peren district Administration ajanga district nung October 21, 2024

anepdang 7:00 ako nungi tenzükba lokti nübuttsük alitsü, ta sangdong ka ajanga ashi. Iba dak sendakba nung Deputy Commissioner, Peren, Hiazu Meru-i sorkar department, Urban Local Bodies, public institutions ajunga dang iba sentong nung shilem agitsü ayongzükba liasü.

Kohima nung lokti nübuttsük atema mapa lemsar

Dimapur, Mongputeni/Oct. 18 (TYO): Kohima nung October 21, 2024 anepdang 8:00 ako nungi tenzükba lokti nübuttsük alitsü, ta Home Department sangdong ka ajanga ashi.

Iba lokti nübuttsük nungya sorkar mapa inyaker ajak, Kohima Municipal Council, NGOs aser Wards ajunga nung nüburtemi shilem agitsü.

Iba atema department ajanga mapa lemsüogo aser sorkar indang department temi mayimjemba lenmang tem pei Wards ajanga inyaksü. Iba atema Deputy Commissioner, Kohima aser KMC dang Wards ajunga nem nüngdakba totuyuba agütsütsü nungloksü.

Nüburtemi junga shilem agitsü mechi pei ward jurisdiction nung councillors temi achayanga mapa inyaksü.

Department balala nem nungloksüba tesem müreka jana indoktsü par department mapa asütsü. Parnoki mapa

matem tashi inyaksüla aser departmental heads ajanga tenüng ajatsüla aser kasa anogosa DC Kohima nem agütsütsüla, koba sorkar dangi yoktsü, ta ashi.

Jana indoktsü atema Kohima Municipal Council ajanga jelia tesemtem repranga ayutsüla aser dustbins ajak KMC ajanga anepalutsü.

Mapa lemsaba tasazük nung maitsü inoktsütsü atema PWD(R&B) ajanga NHIDCL den yariteptsü.

Iba osang AIR/Doordarshan/Print Media aser PA system ajanga sangdongtsü atema DIPR ajanga nüngdakba mera agitsü.

List nung maliba department temi staff tem New Secretariat Junction to High School Junction nung inyaksü asoshi yoktsüla, ta ashi.

Iba maparen takok ngua inyaksü mechi tesem shia mapalem yamai alitsü:

Sl.no	Designated Locations	Designated Departments/ Agencies/Organisation
1	Assembly Secretariat Area to New sect. Junction	Science & Tech, NPSC, IT, RD, NL Assembly
2	New Secretariat Complex	Secretariat Staff, PWD Housing, Mechanical.
3	New Secretariat Junction to High School Junction	Police, Home Guards
4	Billy Graham Road Junction to DBS	Lokayukta, Higher education, Tech. Education, YR & Sports
5	DBS to Kenuozou Junction	Co-Operation, ATI, SCERT
6	High School to Kenuozou Junction	Tourism, Art & Culture, School Education, Social Welfare
7	Kenuozou Jn to Kezieke Market	LRD, NBSE, IPR
8	Kezieke Market to Razhu Point	KCCI
9	Razhu Point via D Block to Old MLA Hostel	Lotteries, Industries, Treasuries & Account
10	Razhu Point via NST to Old MLA Hostel Junction	KCCI
11	Old MLA Hostel Junction to TCP Gate	KCCI
12	TCP Gate to NHAK Junction	Planning, Evaluation, Economics & Statistics.
13	Hospital Junction to Para Medical Junction	Chief Medical Officer, PHED
14	TCP Gate to SKV Petrol Pump	Transport, Power, DUDA
15	SKV to Martyrs' Park	Women Development
16	Martyrs' Park to PHQ	Commissioner's offices, CAWD, Border Affairs, Fire & Emergency Services
17	Classics Point to Raj Bhavan Area	Urban development, Health & Family Welfare, Irrigation.
18	PHQ Point to Old MH via Jail BSNL office	Prison, Forest, Environment & Climate Change, Law & Justice, Labour
19	PHQ Point to AG Road Jn.	Soil & Water Conservation, Sericulture, Veterinary & AH, Agriculture
20	AG Jn. to CRPF Camp Lerie	Labour, Employment & Skill Development, Legal Meteorology, Horticulture, Fisheries
21	Hospital Junction New Market Kenuozou	Road & Bridges, Highways, New & Renewable energy

UCC Committee-i Uttarakhand CM nem report agütsüogo



October 18, 2024 nü Dehradun nung Uttarakhand Chief Minister, Pushkar Singh Dhami-i Uniform Civil Code (UCC) renemtsü asoshi shimba committee ket nungi report agizükdang tangokba noksa nung angur.

New Delhi, Mongputeni/ October 18 (Agencies):

Hokolbarnü Uniform Civil Code (UCC) committee nung Chairman, Shatrughan Singh-i committee report Uttarakhand chief minister, Pushkar Singh Dhami ket nung agütsüogo.

Iba sülen osangbenertem den jembidang Chief Minister Dhami-i, sorkar tentetba sülen UCC atema mezüing telemtetba agiba ama sorkari inyaker, ta metetdaksü.

“State Assembly elections atongtsü anogo ana lia party tenüing nung ni state nüburtem matsüingdang onük ka benokasorkar akümba sülen mezüingbuba telemtetbaji UCC asütsü ta metetdakja liasü. Nüburtemi vote ajanga onok nem tashi agütsüba asoshi onoki state nüburtem dang pelar,” ta Dhami-i metetdaksü.

Iba bill renemtsü atema Justice Ranjana Prakash Desai

leniba nung committee ka tenteta liasü, iba sülen taküm February 7 nü Legislative Assembly nung bill ji agizük. February 7 nü bill agizükba sülen ibaji agizüktsü atema linük Tir nem agütsü aser March 12 anogo nungbo iba bill ya ozüing aküm,” ta Dhami-i ashi.

Dhami-isa, “UCC manual nungji kiyimba aser balaba, kibong mekümi külemi aliba, asoba aser asüba registrations aser senmangba dak sendakba Arrlatem lir. Online ajanga tasüingdangba balala metettsü atema mobile app ka yangluogo,” ta metetdaksü.

“Iba ozüing manual yanglutsü atema Shatrughan Singh aser par team nem mapa nungloksü aser tanü parnoki ibaji onok ket nung agütsüogo,” ta paisa ashi.

Dhami-i, UCC ya nisung ajak kasa ajangzüktsüsa yangluogo, ta ashi.

“Iba UCC ya kar anema

masü saka ajak tajangzük angutsüsa yanglu, ta ni züingbong ashir. Ozüingtemji ajak atema kasa dang asütsü,” ta pai ashi.

UCC Committee Chairman Shatrughan Singh-i, “Committee-i mapa renema inyakba sülen state sorkar nem agütsüogo. Tanüingba mapaji state sorkar dak aket. Koba anogo nung benoktsüar ibaji Rajya Sabha-i lemtetstü. Onok shilembo inyakogo,” ta ashi.

Uttarakhand UCC bill nungji kibong mekümi ki ka nung külemi alirtem registration agitsü, tanur asüding kiyimba nokdangtsü aser balaba atema kasa inyakyim alitsü densema lir. Iba ozüing kübok tamangba yimsü balala kübok tetsür ajak nem kasa kiojen temeden agütsütsü, tetsürtem arrshi küm 18 aser teburtem arrshi küm 21 ajungba sülen ang kiyimtsü aser kibong akümer ajaki registration agitsü densema lir.

PM Modi-i Russia semdanga BRICS senden nung adentsü

New Delhi, October 18 (Agencies):

Ato kilonser Narendra Modi-i October 22-23 anogotem nung Russia semdangtsü aser Kazan yimti nung ayongzükba 16buba BRICS lenirtem senden nung adentsü, ta Hokolbarnü Ministry of External Affairs (MEA)-i metetdaksü.

Russia Tir, Vladimir Putin-i jaokba nung ajemdaker Modi-i

Russia semdangtsü.

Russia semdangba mapang nung Modi-i BRICS züingsem linüktem nungi lenirtem den jurila senden amentsü aser Kazan nung jaokba lenirtema ajurutsü, ta MEA-i metetdaksü.

Taküm BRICS senden omenji “Strengthening Multilateralism for Just Global Development and Security” lir. Iba senden nung lenirtemi kanga

tongtibang onüktem nung o lemteptsü.

“Kasa senden nung BRICS-i tenzükba mapatong balala asadangtsü asoshi maongka angutsü aser tarutsü nung amalitepa inyaktsü asoshi lenmang tasen bushitsü,” ta MEA-isa metetdaksü.

BRICS züingsem linüktemji Brazil, Russia, India, China aser South Africa linüktem lir.

EC-i Rajasthan nung assembly by election atema sangdong agütsü

Jaipur, October 18 (Agencies): Hokolbarnü Election Commission-i Rajasthan nung assembly menden 7 atema by election agitsü asoshi sangdong agütsüogo.

October 25 anogo tashi nung nomination file asütsü.

Chief Electoral Officer, Naveen Mahajan-i, Rajasthan nung assembly menden 7 atema by election agitsü asoshi Election Commission of India-i sangdong agütsüogo, ta metetdaksü.

State nung Jhunjhunu, Dausa, Ramgarh, Deoli-Uniate, Khinvsar, Salumbar aser Chaurasi mendentem atema election agitsü asoshi inyakyim

tenzükogo, ta pai ashi. Nominations paper ji anogo shia anüingdang 11:00 ako nungi nikongdang 3:00 ako tashi nung returning officer nem agütsütsü akok.

Nomination papers ji October 28 nü repringshitsü aser nomination papers agientsü atema tatembangbuba anogoji October 30 asütsü, ta Mahajan-i ashi.

November 13 nü election agitsü aser nüngdak dang süra assembly constituency tenetprongla nungji anepdang 7:00 ako nung nikongdang 6:00 ako tashi vote agütsütsü aser November 23 nü votes zünga election agiba osang sangdongtsü.



October 18, 2024 nü New Delhi nung mopung menenba nokdangtsü atema gari nungi tzü akahdang tangokba noksa nung angur.

Omar-i aniba cabinet-i J&K state jenjang atema bangzüing ka agizük

Srinagar, October 18

(Agencies): Jammu & Kashmir nung Chief Minister, Omar Abdullah-i aniba mezüingbuba Cabinet senden nung Centre sorkar dang J&K Union Territory nem tanaben state jenjang agüjang, ta takhangba agütsütsü asoshi bangzüing ka agizükogo.

Iba bangzüing ajanga Centre dang tekeraba nung Jammu and Kashmir nem tanaben state jenjang agüjang ta mepishir.

Osang angazükba agi, iba bangzüing atema ‘draft’ renemogo aser National Conference lenir, Omar Abdullah-i Delhi tsüingdong oa Ato kilonser, Narendra Modi nem bangzüingji agütsütsü.

J&K assembly election nung National Conference aser Congress na longjemer toktepa liasü Ajisüiaka Congress-i, Jammu & Kashmir nem state jenjang magütsü tashi party-i sorkar nung shilem magitsü, ta metetdaksüogo.

Tawa assembly election atema nüboyimba mapang nung BJP dak alaka tanüingba party ajak atema tongti onük anaji state jenjang aser Arlla 370 liasü.

Srinagar semdangba mapang osangbenertem den jembidang National Conference Tir, Dr. Farooq Abdullah-i, “Tamalen-a onoki state jenjang atema jembigo aser tanüa onoki ita ana tsüingda state jenjang agüjang ta mepishiba ken o Supreme Court-i angadangtsü melungogo. Kobi melii India sorkari state jenjang agütsütsü, ta onoki amanger,” ta

metetdakja liasü.

Assembly nung National Conference-i Arlla 370 onük benoktsü asü?, ta asüingdangba langzüing Abdullah-i, party-i court nem temepishiba agütsütsüsa akümtsü, ta ashi.

Kasa senden nungji Jammu & Kashmir nung tawa shimba minister tem nem portfolio lema agütsü.

J&K Lieutenant Governor-i metetdaksüba Transaction of Business of the Government of Union Territory of Jammu and Kashmir Rules, 2019 kübok Rule 4(2) nung ajemdaker Deputy Chief Minister, Surinder Kumar Choudhary nem Public Works (R&B), Industries & Commerce, Mining, Labour & Employment aser Skill Development portfolios lezmüktsü.

Sakeena Itoo nem Health & Medical Education, School Education, Higher Education aser Social Welfare portfolios lezmüktsü aser Javed Ahmed Rana nem Jal Shakti, Forest, Ecology & Environment & Tribal Affairs lezmüktsü.

Javid Ahmad Dar nem Agriculture Production, Rural Development & Panchayati Raj, Cooperative & Election portfolio aser Satish Sharma nem Food, Civil Supplies & Consumer Affairs, Transport, Science & Technology, Information Technology, Youth Services & Sports aser ARI & Trainings portfolios lezmüktsüogo.

Tanüingba departments ji nüngdak apir tangar minister tem nem lezmüktsütsü.



October 18, 2024 nü New Delhi nung Delhi Chief Minister, Atishi aser taoba mapang Chief Minister, Arvind Kejriwal nati osangbenertem den jembidang tangokba noksa nung angur.



TIR YIMYIM YIMOBILEM (EDITORIAL)

DIMAPUR KÜPTOKNÜ MONGPUTENI 19, 2024

Ali, tzu aser anung lenmang

Nagaland nung gari lenmang tesadem aser tajung kangasa nungdakba agi yakanü Mon nung Nagaland angh La Ganesan-i nübertem den jembidang, Nagaland arütsülen aliba tesemtem lenmang tajung agi yakta sentaktepsü ta metetdaksüba asenokia angashir alitsü. Ano, Kohima nunga National Highways repringtsü lezmükba yimsüsür, Deputy Chief minister T.R.Zeliang-ia National Highways & Infrastructure Development Corporation Ltd aser Nagaland PWD purtem dang Dimapur-Kohima lenmang National Highway 29 yanglushiba mapa yabo tan October nungsa atemtsüla ta ozüngsa agütsüogo. Talisa, Hornbill benjong ya December ka nungi tenzüksü asünungji, iba benjong nung adentsü atema bendang balala nungi raliwalirtem aser tongtibang nisungtem arutsü alinungji, parnok jajatsüba gari lenmangjibosa tajung asütsüla. Ibaji Nagaland mera aser akhüm asütsü. Atangji, tang yabo Nagaland nung gari lenmang tajung aritepa yanglushitsü jembiba mapangbo masütsüla. Aji oda, tang yabo District headquarters shia nungi Kohima atongba gari lenmangbosa tajung aser tesadem yanglur alitsüba mapang lir. Ajisüaka, Dimapur nungi Kohima-i atuba lenmang kilometer netera meyanglutetba yimten aser nebertem dak nungi kechi tajung balaka imlatsü ali ? Joko, taküm-a mapang nenjunga arur asünungji aiener aru menepa Dimapur nungi Kohima tashi danga asenok nümadangtettsüsa yanglutetra, asenok asoshiho aji tuluka asütsü. Atangji, Nagaland ya Dimapur nungi Kohima tashiji dang masü aser Kohima-i aruba raliwalirtem aikati Nagaland telong repringdangtsü atema Kohima atena onütsü, anungji National Highway aser state Highway repringba kilonser aser ketdangsertemi Kohima nungi Phek, Wokha, Tseminyu, Mokochung, Zunheboto, Longleng, Mon, Tuensang, Kiphire, Noklak aser Shamator tashi Hornbill repringi aruba raliwalirtemji ayongayonga otettsüsa gari lenmang yanglutsütsü tim. Kasaji, Dimapur nungi Niuland aser Peren district-temi aoba lenmanga khu abenba gari tulu dena ayongayonga jajattettsüsa tang yabo renemer alitsüla. Item gari lenmangji kisung junga yanglutet nung, Nagaland nung lanurtem mapa inyaksüsa mapa jenti adoktsü aser lenmang aisü len nungi rongsen züintsü. Atangji, ali tema nung jajatsüba gari lenmanga meyanglutet kangshia ali nung, tzu aser anungdak jajaba rong aser tayimtsü indang jembitsübo tezüdangtsüka bilemer. Ajisüaka, tangarbo mapa inyaker alima takar kumdaktsütsü merandang, asenok tokolok tila dener mapa meinyak takar akümstsü merangba agi gari lenmanga meyanglutetba ya alimai atatsüba masü, alimabo asenoki arishia memenep renlokdagi, anungji asenoka alima renloka aobaji meneptsüsa aridaktsü kanga rongdak nungdaka kumogo. Aji oda, gari lenmang dang masü saka train lenmanga Nagaland ajak sentaktepa yanglutsü sentong yanglutsüla aser khu abenba tayimtsü tulua anentettsüsa Nagaland anüdok aser anülulen tayimtsü ter metsü külemi anentettsüsa tayimtsü anendak tulu tesadem yanglutsü mapa tenzüksüba mapang tongogo. Ano, item ali aser anung nung jajaba gari aser tayimtsü dang nungibo ayong nung rong jajattettsüsa tzu lenmang yanglutet nungbo, ajisa dalangba aser tajungba asütsü. Tanga district-tem nung aliba ayongtemji khen yutsür Mokochung district nunga tzüla aser milak ayong lir, anungji item ayong nungji khu abenba rong jajattettsüsa tzu lenmang yanglutet nungbo, asen lima nungi jenjang dalang agi tzümalen tashi khu bener lutettsü aser atutettsü. Joko, tanü asung gari jajaba ajanga tzu mopong kanga menendaktsür asünungji, nisung aser khu abenba lenmang ya akok tashi tzu lenmang ajanga abentsü meranger aser ali nung jajaba garitema akok tashi anü aser electric tashi amshia jajadaktsütsü meranger. Pibo iba tashi nungji lanurtem aremzua inyakdagi. Itemji ajizüka asenoka asen lima renloksü atema gari lenmang yanglutsüba senbosa mechitsüli aser memeshili. Asenokbo tzu lenmangbo maka aser tayimtsü anendaka Dimapur nung dang tilaka lir. Ajia, tayimtsü nungi aludang arem nema lendi bushia adoker. Ashiko, lenir onsaraba agi teinyaker mali aküm südi.

OLEMSABANG

Kanga Rongshitar Nee

N. Saku Imsong, 4th Mile Diphupar

Yashi adok nungi...

Item ajak jagi Nagalima amokpangtsü merangba asenoki züzüa malitsü kar shisemner dang. Ano mapa bushirtem atemaka parnokki asenokji Khristan lima ta bilema liaka aiben Sunday nü dang tatidang agitsü osang sangdonger. Item ajak ya asaa meteta yur külen kibong mapa inyaker dang kanga kumdangdino, ya makok nungbo asen Ao kinsa maksü tuluba den Otsüla, Oboula, Ojala, Obala nungerji yutsür asen Tsüngrem ain adoktsü, kanga aroka shisadanger kumkumshidi noo.

Hai... ano kar bener arudi kar, asen kin ya joko kanga mekongka kümer anasa shisadanger ya. Oh... temulung tatem ni. Asen Tsüngrem taküm lirko kumkum shiang ni. Kechiba aser Aor tesüleni luogo ta nemjemer aser tezü atonger. Oda ashir ashi ken bushidangdi arungkodo. Nisung tai asütsü akok, saka Tsüngrem-i asen Aor kin yamai yariogo ta kar bener aruner. Angazükba dangji tai süra aji ni masü tashir mabensa asütsü. Saka tangar Naga nunger kin ajak senteper oda service ajanga angubabo aika lir, saka UPSC exam nung takok angur mezüng nungi tenzüka tongmelang agi yamai.

1. SHRI TEMEN AONOK – CHANGKI VILLAGE (IAS)
2. SHRI WATITEMJEN JAMIR – SÜNGRATSÜ VILLAGE (IAS)
3. SHRI P. TALITEMJEN – AKHOYA (IAS)
4. SHIRI T. SÜNEP – CHANGKI (IAS)
5. SHRI T.N. MANEN – LONGJANG (IAS) (IPS)
6. SHRI R. MAPUTEMJEN JAMIR – LONGJANG (IAS)
7. SHRI ALEMTEMSHI JAMIR – LONGSA (IAS)
8. SHRI TOSHI AIER – CHANGKI (IAS)
9. SHRI TEMJEN TOY – CHANGKI (IAS)
10. SHRI SENTIYANGER – SÜNGRATSÜ (IAS)
11. SHRI I. WAPANG AO – YAJANG (IAS)
12. SMTI IMKONGLA – CHUNGTIA (IAS)
13. SHRI ASANGBA CHUBA AO – KHAR (IAS)
14. SHRI IMKUM – SÜNGRATSÜ (IAS)

Ano alitsü akok aser parnok ya-a süngsang balala takok anguba den kwika ajak tatongi aika lir. Saka ni asen Tsüngrem Aor den teti tena lir ta shisadangtsü atema tongmelang agi ashirba dang. Anungji kibur-i yimlibilema aser tazüngertemi mabensaba atema tai tokangma ta mepishir.

Saka tangar kin ajak nungi 7 (Seventh) shi dang alitsü südi. Ano alima balala nung oa Tsüngrem mapa inyaker aser shilem balala nung tongti shilem agia mapa inyakertema asen kin nungisa nübo aser alima teimba nung pei tajungtiba agi tenzükertem jenti lirko.

Anungji oh asen kin tajungtem, oda kar majungyongküla Tsüngrem asen kin Aor mesentoki lirko, Oh asen senso tajungtem tezü tanga temulung korema Tsüngrem nüngsen tejembi li ni ta ayimoktsür.

Naga nungeri koda agizüker ta masü, saka shisatsü tuluba nung asen Ao kin koda alimai agizüker ta shisadanga yimkumshir anisüngzüka SEMTO nungji manenzüki aposoa alima dangi aposoa longjemshir, Yim, Kidong, Tzükong ta tiyak sangtepa masü, saka asentenshir tezüdanga melie LONGTROK PONGMANGA makazüi Tsüngrem yimsü mezüng agizüker KIN süra, Tsüngrem peladakja alima den jangyu metema ken ano tali kumkumshir tasü tait nangri kanger, metzü metemshir tejakleni asemdi, Oh asen Ao kin temulung tangshir aposoangni ta ozü tambur mulung arongba nenok dak senoktsüra ni. Ken nung ashi ama Ken No. 286 'Na menen lisüi-a aodang, tangari na repringdang. Taküm nung merüka liang, Kibuba nü dak ngudakjang' ta lirji. Tamajung tangar metsüdaktsüsa kar lira, Tsüngrem yimsü mezüng agizüker Ao kin süra jenjang maitsü aser amajok O jembia Tsüngrem nüng sena makazüi ajak nung tangari asen akümstsübuttsüsa longjemer tejakleni apusoti arungni, Oh asen KIN AORTEM.

KUKNALIM.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

UK nung tang mezüngbuba National Week of Prayer mongdar

October 18, 2024: Khristan tentet balalai UK nung tang mezüngbuba National Week of Prayer ayongzüka mongdar; iba sentong ya October 20 nü tembangtsü.

Evangelical Alliance, Open Doors, 24-7 Prayer aser London City Mission densema Khristan tentet aikati longjemer iba sentong ayongzüka sülen Khristan meyirjang aika, networks aser telok aikati UK atema sarasademtsütsü nangzüka liasü.

National Week of Prayer ya Arogotem, community centers, tzüyinküm, castle

grounds, parks aser tanga tesem balala nung ayongzüka agidar.

Iba dak alia online ajanga sarasadem sentongtem nung aikati shilem agir aser item sentong agiba 'live' sayur.

October 16 nü tongti sentongji Westminster nung aliba Emmanuel Centre nung agiogo.

Hopta piyong Khristantemi sorkar, healthcare, shisaliok aser business atema sarasademter.

Sentong ayongzükertemi, "Iba ama amalitep ya Tanela Temeshii leniba sayatenya

mapa ka lir. Nisung aikati taküm kuli lemsateper aser tekülem kentem ajanga aika ajungmesor," ta ashi.

UK aser British Isles nung Khristan organisations aser Arogotemi tamangertem dang Tsüngrem dang tatok meshitsü, tanela asentenshitsü aser linük nung temelenshi tulu adoktsü atema sarasademtsü ayongzüka liasü.

National Week of Prayer ayongzükertem rongnung Christians in Government, City Prayer Breakfast, Christians in Politics, aser Christian Embassy London densema lir.

Russia den sendaktepba Arogo nokdangba Ukraine nunger aikati pusemer

Kyiv, October 18 (Agencies): Ukraine nung Russia den affiliate süa aliba teloktem nokdangtsü atema benokba ozüng Ukraine nunger shilem 80-i pusemer, ta survey ka ajanga bushitet.

Ukraine-i Orthodox Arogo kongsang ka nokdangtsü benokogo. Orthodox Arogo jagi Russia nunger den amaliteper, ta tai tonglokja lir.

Survey nung telangzüba agütsür shilem 6 bo Ukrainian Orthodox Church (UOC) nungi lir. Russia-i Ukraine anema raraba nung Arogoi Russia den amalitepa inyaker, aser Orthodox Arogo nung lenir karibo Russia nunger intelligence ketdangsertem den yariteper, ta tai tongloktsür.

Ajisüaka Ukraine nung aliba Arogoibo, 2022 küm March ita nung parnoki

Russian Orthodox Church den tesendaktep raksaogo, ta ashir.

August ita nung Ukraine-i Ukraine nunger litsü nung Russian Orthodox Church nokdangtsü atema ozüng ka agizükogo.

Sorkar Commission kati Russia nunger den sendaktepa aliba organisations bendentsü aser nokdangtsü.

Osang angazükba agi, Ukraine nung Ukrainian Orthodox Church (UOC) nokdangba inyakyim atema mapang talangka agitsü, kechiyong UOC Arogo shia nem UOC toktsütsü atema telemtetba agitsü asoshi ita 9 mapang agütsütsü.

Ukraine nunger teimbaka Orthodox Church of Ukraine nung züngsema lir. ROC nungi razüka aotsü asoshi 2019 küm OCU tenteta liasü aser ibaji

Ecumenical Patriarch of Constantinople-ia agizükogo.

Russia nungeri amakba ajanga UOC Arogo aikati ROC toktsür OCU nung denogo, aser ibaji ajanga Arogo züngsemtem rongnunga mangatettep adoka liasü.

Kyiv International Institute of Sociology-i agiba survey ajanga, ozüng tasenba ya Ukraine nunger litsü nung nütsüng teimbakati pusemer; Russophone nunga nütsüng shilem 70 dak temai iba tenokdangba ozüng ya pusemer, ta bushitet.

Ukraine-Russia tsüngda rara tenzüka mapang nungi Ukraine-i, Arogo ajanga linük lendongi yoktsü, ta metetdakja arudar.

Russia den amalitepba ajanga UOC lenirtem aika puogo aser ken o angadangogo.

Yimtsüng ka nungi meindokba Khristantem ICC-i yarir

October 18, 2024: India nung aliba Hindu nunger yimtsüng ka nung Khristantem meindok, ajisüaka parnok Tenla ki ka nung jenoka liasü, ta International Christian Concern (ICC)-i metetdaktsü.

International Christian Concern (ICC)-i Southeast Asia nung parnok jenoka alitsü atema parnok nem kimong ka agütsüogo.

Sandas kibongji Hindu kibong nung intet, ajisüaka 2021 küm parnoki Khristan yimsü agizüka liasü. Parnoki Yisu Khrista agizükba ajanga par

kinüngertemi parnok dak azük aser yimdak nungi meindoka liasü. Tsüngrem taochi ajanga par kibongi Arogo ka ajanga tejenokdak angu aser Arogo li nungji küm aika lia aruogo.

Iba Arogo nungji züngsemtemisa Sandas kibongji tanela chiyungtsü agi mesü.

Taküm küm tetenzüklen Sandas kibong jagi Arogo liji toktsür aotsüsa aküm, ajisüaka Tsüngrem taochi ajanga local ministry kati ki ka asütsü aser alu ayimtsü atema par kibong nem ali sq.ft 27,000 agütsü aser ali atema 'rent' ji ministry-i

agüja aru.

Ajisüaka par kibong yariba ministry-i ali atema 'rent' ji magütsütetsüsa tensa ajuruba agi ministry-i ICC dang teyari meshia liasü.

Sandas kibongi tangbo ki ka sür alu nung aonsotsü balala yoka lir.

Lendong timtem liaka Sandas kibong tanela jenjang ainer aser parnoki anasa alirtem den Khrista osangtajung lemsatepa arudar, aser kobi melii par kibongi prayer fellowship tenzüksü tebilemba lir, ta ICC-isa metetdaktsü.

ANOGO ABEN TSÜNGREM DEN

Tatsübaleni Tatidangdaksü

Idangji Abisahai Dawid dang ashi, "Tanü Tsüngremi ne tsükchir ne ket nung bendanga agütsüogo: Anungji tang ni ne dang mepishir, Nü jagi ali nung tsüngloka ni pa dak ken dang tsüngdi aser ni tanabenbo pa dak matsüngtsü. 1 Samuel 26:8.

Ne taküm alizüng nung ken ken tatsüba leni aotsü na atitangtsü akok. Dawid aiben tatsübaleni aotsü atitang aser tatem nung pai chuba menden agi. Ainkar Samueli Dawid chuba asütsü ta totzü mezüja shimtet (1 Samuel 16:12-13). Pai Tsüngremer mapang ataa alidang, Saul chuba yimli nung lendong bener aruba pai ngua liasü. Sauli Dawid tepsettsü merang, pa jena aotsüsa aküm.

Dawid jenshia aliba mapang, pa dangi mapang tajung ka aru. Dawidi Saul teimla makaba jenjang ka nung angu, pa army den mejanger liasü. Abisahi Saul tepsettsü Dawid dang asüngdang. Ibai abensaa angatetsüba mapang ka liasü. Sauli aiben Dawid tepsettsü merang. Dawid chuba süidaktsütsü ni bilemer ta Tsüngremi ashi. Pai mapangji pa teka nung agir, pa jenshia aliba mapangji tatembang kati arua Tsüngremi mezüja shimtetba chuba ka ama chuba menden nung amentsü mapang aru. Saka pai chuba mendenji aginüa aser aji agitsü pa temeten lir ta metetta liaka pai Saul dang tsüngchir süa aliba meindoknü. Pai Saul chuba tepsettsü memela. Tsüngremi tuyuba lenmang nung mesüra tanga lenmang nungi pai mulungba ataloktsütsübaji tamakoktsü.

Ne dangi kasa tatitangji arutsüa akok. Ne tembar tajungi ataa meli-i yakta Tsüngremi mulungbaji ataloktsütsü ajungshitsü akok. Tatembang jagi tetenzükbaji melentsütsü ta bilema nai tia mapangji dang azüoktsü merangtsü akok. Tsüngremi atatsüba mapangji iba mapang ya lir.

Tsüngremi na jenjang ka tongtsütsü renemtsütsü akok, mesüra tanga lemang ka tuyutsü akok, saka mapangji ano matong asütsü akok. Ne mulungjang mita liang. Tsüngremi mulungba nung aotsü tangar ajanga ne tsüngchiba teraksadaksü.

US nung Khristan million 32-i Tir election nung vote magütsütsü

October 18, 2024: US nung Khristan million 30 dak temai US Tir election nung vote magütsütsü, ta survey ka ajanga bushitet.

Arizona Christian University Center-i agiba survey ajanga, 2020 küm nungi 2024 küm tashi nung nüburtem rongnung vote agütsütsü tejangraba ajema kümogo, ta bushitet.

November 5 nü Tir election agitsü aser iba election nung vote magütsütsü tebilemba alir shilem 57-i parnoki candidate anaprong-

Donald Trump aser Kamala Harris naprongla mesakloker, ta ashi aser shilem 55-i candidate anapronglaji parnok tangatetba ama masü, ta ashi.

Vote magütsütsü tebilemba alirtem indang tongti kuliji yimtenren aser election nung shilem agitsü tejangraba maliba agi, ta ashi.

Osangbener den jembidang Evangelical lenir, George Barna-i, "Nüburtem taküm nung kongshitsü atema aiben pastor teti maangka bushir aser par Arogo aliba tesem nung nüburtem yaritsü meranger," ta ashi.

"Laishiba nung pei teinyaktsü shilem ka ama nüburtem dang vote agütsütsü ajungshiba agi dangbo kecha masütsü, ajisüaka vote agütsütsü tongmelang agi ajungshiba ajanga Tenla kidangi teti aoer nisung million 5 shi ibo vote agütsütsü," ta pai ashi.



Tawa South Korea kübok Busan nung COALA 2.5 senden nung adener Global South mission lenirtem tangokba noksa nung angur.

AO OSHI ANGAZÜKDAK: TANÜ ANGAZÜKTSÜBA OJANG



Tanur

(n) nisung tain maküm (child)
* Tsüraburi tanur dang sarasadem sayutsüla.

Taoba

(adj) tesüiba mapang (past, former)
* Taoba mapang Tsüngremi asenok kanga moatsü.

OLONG PAITEP # 6955

Grid for OLONG PAITEP # 6955 with numbers 1-17 in various cells.

TIPLEN :

- 2. Külen dang masü - (6)
6. Suwar masü - (4)
7. Temekoki ali nung tsükdak - (6)
9. Ali agi akümba - (4)
10. Tanishir - (5)
11. T _ _ _ _ sa - (4)
14. Asüngdangba ashi - (6)
16. Saklok - (4)
17. Arem shiruru ka - (6)

LANGTSÜNGLEN :

- 1. Ammang ozü - (5)
2. Tekabu-i tashi agi amet - (4)
3. Sü yanglu - (4)
4. Kimen - (6)
5. Ain tamajung - (3)
8. Saklok - (4)
9. Chiyungtsü tamajung aküm - (4)
10. Kiochtsü yangluba - (6)
12. Tsungi o shia anitet - (5)
13. Tzüma nung jajaba - (3)
14. Tanemi - (4)
15. Me _ _ _ _ ra - (4)

OLONG PAITEP # 6954 TELANGZÜBA

TIPLEN :

- 1. Tesangra, 5. Mungo, 7. Kisen,
8. Salem, 12. Semki, 14. Kilem,
15. Kensü, 16. Sangpang.

LANGTSÜNGLEN :

- 1. Temesen, 2. Raksa, 3. Aon,
4. Aso, 6. Nile, 9. Alizüng, 10. Omen,
11. Lemta, 13. Ola, 14. Kin.

NAI-A YA METETTER MA



Chinese textile company-i sü arür 30 tema anidener "largest pair of jeans" indang Guinness World Record yangluogo. Yulin City

nung Yixing Textile Co. nung garment makers-i anogo 18 nung jean pants tulutiba arüa liasü. Parnoki arüba pant tasazükji 250 feet, 5 inches long aser waist circumference 190 feet, 10 inches lir. Parnoki denim fabric feet 18,044, 25 feet, 59 inches of zipper aser 3-foot, 94-inch stainless steel button enoka yanglu.

TEPELA TASOBA ANOGO

Tenüng : Mr. Liner (Tenzin Choezin)
Tasoba anogo: 19.10.2022
Küm : 2
Talidak : Nainital (Ultrakhand)
Tsüngremi semchir Mr. Liner (Tenzin Choezin) küm ana tashi anir aruba asoshi Pa tenüng asanger.
Ano maneni semchir nem arishi talang moajangma ta sarasademsür.
Temeim Otsü, Obou.
Tzüdikong Town.



Manipur Congress-i ADC elections agitsü rongshir



Imphal, October 18, 2024 (Agencies):

Manipur Congress lennirtemi state sorkar dang Hill Area Committee Resolution 59 kübok tebilemba ka benokba magizüker ta metetdaksüogo.

Iba tebilemba ya Autonomous District Council (ADC) shia atema interim committee ka ka tentetsüba lir.

"State sorkari tesüiba küm pezü tashi Autonomous District Council (ADC) magiba aitsür aser Hill Area Committee Resolution 59 magizüker" ta Congress lennirtem Samuel Jendai aser Victor Keishing nati Congress Bhawan nung osangbener dang ashi.

"State sorkari lemtet meyipa

agitsüla aser ADC elections agiang. Mapang shitak nung district council elections agitsüla kechiyong küm pezü süia aruogo. Hill Area Committee Resolution 59 kübok züngsem 20 agi committee tentetsüba tangatetba atema sasa bilemer" ta Jendai-i ashi.

BJP sorkar ya "anti-tribal" aser "anti-hill" lir kechiyong parnoki küm pezü tashi Autonomous District Council (ADC) elections magir. Manipur nung autonomous district councils 6 lir aser elections thinenba ajanga lisopur lennirtemi tebilemtsü abener ta pai ashi.

Hill Area Committee nung lisopur teimba lir aser Manipur

ya territorial council ka dang alidang nungi standing committee ka ama tenteta liasü. Manipur state anguba sülen Hill Area Committee ya ketdangsübaren reprangba telok ka aküm, ta pai ashi.

District Council Act of 1971 nung küm pungu shia election agitsü aser takoktsü süra küm ka atsünglangtsü lateta lir. Ajisüaka district council elections magii küm pezü jungogo, ta Jendai-isa ashi.

"Local level nungi democratic tangatetba tenzüksüla anungji district council aser panchayat elections mapang shitak nung agitsüla" ta Victor Keishing-ia ashi.

Hill Area Committee Resolution 59 kübok elections magira Autonomous District Council (ADC) shia nung züngsem 20 agi akümba interim committee ka tentetsü. Iba luden nung taoba ADC members, local self-government experts, eminent persons & intellectuals den district shia nungi government nominees anana adentsü.

Assam Chief Minister's Atmanirbhar Asom Abhijan 2.0 tenzükogo

Guwahati, October 18, 2024 (Agencies):

Assam nung entrepreneurship ajungkettsü atema Chief Minister Himanta Biswa Sarma-i Hokolbarnü Chief Minister's Atmanirbhar Asom Abhijan (CMAAA) tenzüksüogo.

CMAAA 2.0 kübok beneficiary temi Rs 5 lakh aser Rs 2 lakh teyari angutsü.

CMAAA mezüngbuba shilem nung lanur 25,000 nem teyari agütsüogo aser Pradhan Mantri Mudra Yojana nung shilem agirtem yaritsü.

"Onoki Assam nunger lanurtem pei sasa züsenteta litettsü aser entrepreneurship tangatetba agütsütsü atema bendanga agüja inyaker" ta CM Sarma-i ashi.

CMAAA 2.0 atema November 18 tashi registrations asütsü akok.

Assam nung by-elections agitsü aliba district pungu nungi lanurtemi Model Code of Conduct (MCC) tembangba sülen tenüng agütsütsü akok.

Iba sentong ajanga lisopur shishilembaba ajungkettsü aser Assam lanurtem nem maongkatem agütsütsü.

Manipur tensa ajanga Meghalaya nung drug talila shibelener

Shillong, October 18, 2024

(Agencies): Manipur nung mepetmesü adokba ajanga Meghalaya nung ozüng alema drug shibelenba mapa kanga bulua inyaker ta Social Welfare Minister Paul Lyngdoh-i ashi.

Meghalaya ya Golden

Triangle anasa lir aser iba ajanga drug smugglers-i mapa inyaker. Manipur nungi drugs tali bener aruba ajanga Meghalaya sasep nung iba inyakyim noktangtsü mapa tasakba kümogo ta Welfare Minister Paul Lyngdoh-i ashi.

"Ozü state nung drug shibelenba azüoktsü atema

onoki meranger. Ajisüaka Manipur nung tensa melenshiba ajanga iba khuret tuluba kümogo" ta pai ashi.

Iba khuret atema New Delhi nung oa Central lennirtem den ajuruteptsü aser Meghalaya nung drug shibelenba khuret lemsateptsü ta pai ashi.



Indian Army-i Brihostibarnü Battle of Walong ataloker küm 62 ajungba bilemteta amongdang Walong Brigade-i Pipes and Drums display asüdang agiba noksa ka angur. 1962 rara nung taküm bendanga agütsüba sepaitem aser sensotem nem tetushi agüja iba anogo among. Sentong nung Women, Child Development, and Cultural Affairs Minister Dasanglu Pul tongti tesemdanger liasü.

North Korea-i Russia atema sepa'i 12,000 yoktsü: Seoul

Seoul, Mongputeni/Oct. 18 (Agencies): Ukraine anema raraba nung Russia yaritsü atema North Korea-i sepa'i aika yoktsü telemtetba agiogo, ta South Korea indang itdangiter temi ashir.

“Ukraine nung raradaki special forces densema brigades pezü aliba sepa'i 12,000 yoktsü tawa North Korea-i telemtetba agiba National Intelligence Service-i angazükogo ta ashir,” ta Yonhap news agency ajanga ashir.

NIS-i iba osang ya tejangja lir ta AFP dang ashitsü memulung. “North Korea sepaitem arakzü tenzükogo,” ta NIS source ajanga Yonhap dang ashir.

Kyiv anema raraba nung Russia yaritsü atema North Korea-i sepa'i 10,000 nem training agütsür ta itdangiter osang angazüka lir, ta Ukraine Tir Volodymyr Zelensky-i Brehostibarnü shia liasü.

“Parnok par li nung renemshir, sepa'i 10,000, saka parnok ano Ukraine mesüra Russia-i meyok,” ta Zelensky-i NATO defence minister tem

senden amenba sülen ashir.

Russia sepa'i jenti asüba mechi North Korean sepaitem dak metaloka lir, kechiaser Russia nung lanur aikati sepa'i mapa meinyakner, ta Zelensky-i ashir.

Pyongyang-i iba mera agiba atema jembitsü asoshi South Korea Tir Yoon Suk Yeol-i ajungben security meeting ka Hokulbarnü jatepa liasü. Russia aser North Korea tsüngta mitkar tsütsü tesendaktep ya military supplies agütsüba dang masü sepaitema yoka kimogo, ta senden nung jembü.

Iba inyakyim ya asen linük atema kisüng masü saka linük ajunga asoshi security tsütsü timtem tulu lir, ta tir indang office ajanga sangdong ka nung ashir.

World War II sülen North Korea linük kumteter Pyongyang aser Moscow ya tembar ama lia arur aser Russia-i 2022 küm nungi Ukraine amakba sülen tesendaktep tajungba akum aser Kim Jong Un-i Ukraine nung amshitsü atema nok-nü yoker ta Seoul aser

Washington-i mapang talangka nungi jembia arur.


Russia Tir Vladimir Putin-i June ita Pyongyang semdang aser iba mapang linük ana tsüngta defence tsütsü tezüngzüktep yangluba ajanga UN-i linük anaprong nem tenokdangba agüja aliba nung aibelenä nok-nü agütsütsü akok ta bilema liasü.

Ita tetenzüklen Ukrainian media ajanga sangdong ka nung October 3 nü Donetsk anasa Russia-i amokbanger aliba tesem ka nung Ukraine-i missile amshia amakdang North Korean military officers trok tepset ta ashir.

Iba mapang South Korea indang defence minister Kim Yong-hyun-i ozüng yanglurtem dang iba osang ya shidak alitsü südi ta shia liasü.

“North Korea asoshi Russia nem injang aser missiles agütsüba kisüng masü saka nok-nü balala amshitsü aser asangsang rara nung shilem agitsü angazüktsü ya tongtipang lir,” ta Seoul nung aliba Institute for Far Eastern Studies nung professor Lim Eul-chul-i ashir.

MENUNGRA BILEMTETER



Asür N. Imsuyanger

Pungmang ka ama dang bilemer, saka asangsang nung nai onok toktsür orr tanü (October 19, 2024) agi küm 2 abensar, saka onok mulungjang nung na teti alir. Nü temeim mapatem aser nü sayu O tajungtem bilemteta onok mulung süngzükter. Tanü na onok den akümlü nung meliaka onoki iba anogo na menungraseta sarasadema amonger.

- Temeim kinungtsü aser kinungertem.

F.NO. A-60011/6/2023
GOVERNMENT OF INDIA
MINISTRY OF LAW AND JUSTICE
DEPARTMENT OF LEGAL AFFAIRS
CENTRAL AGENCY SECTION

Central Agency Section, Department of Legal Affairs (DoLA), Ministry of Law & Justice ajanga iba office-i nungdakba ama tzüzüng-ozüng dak sendakba nung professional services agütsütsü atema contract basis nung posts 5 asoshi “Young Professionals” ama inyaksü atema application meshir. Application indang formant iba department indang portal: <https://legalaffairs.gov.in> nung angutsü. Application den nungdakba kulizüng scan sür mail ajanga Saji.gopinathp@nic.in dangi iba sangdong adoker anogo 30 tsüngta nung yoktsüla. Applications ya e-mail ajanga dang agütsütsüla. Anogo süyir mesüra tsüngtong arua mesüra post ajanga yokba application magizüktsü. Terms & conditions, eligibility norms amala tejangja metettsü asoshi url: <https://legalaffairs.gov.in> nung angutsü.

CBC 24201/11/0006/2425

Sinwar asüba ya Hamas asoshi takoksa tulu, saka rara atemba masü: Netanyahu



Tel Aviv, Mongputeni/Oct. 18 (Agencies): Yahya Sinwar tepsetba ya Gaza nung Israel-i Hamas anema raraba nung takok tulutiba lir.

Pa asüba ya Hamas asoshi takoksa tulu lir, koba pai raratsü tashi ka kumdakja Israel puti otsü nung takoksa tulutiba agütsü.

Pa ya special forces temi sentong yanglur operation agiba nung tepsetba masü, saka Gaza south tsütsü Rafah nung Israel sepaitemi ajurushia tepset.

Sinwar tepsetak tangokba noksa ka nung pa ya combat gear semer tank shell agi kongshiba ki nung long arangsa alida süa liasü.

Israel Ato Kilonser Benjamin Netanyahu-i sepaitem nem tenüngsang agütsü aser takok komarka tulu asüyonga ibai rara tatem masü ta ashir.

“Asen yirutsür dak kechi ataloktsü, aji tanü asenoki ano

maneni jangja sayuogo. Tanü asenoki alima dang tajungi tamajung madak takok anguba sayuogo. Saka ni meima alirtem, rara ya ano matem. Ibai tasak aser asenok kanga akoksar,” ta pai ashir.

“Asen jakdang tayongzükba tulu ano lir. Asenoki arema nokdaktsü nungdaker, telungjem, tasü tait aser aremzükba nungdaker. Asenok külemi raratsü, aser Tsüngrem teyari nung asenok külemi akoktsü,” ta Netanyahu-i ashir.

Israel ato kilonseri pa indang rara nukjidong aiben lemsatepogo, koba Hamas samatsütsü aser pua alirtem kidangi anir arutsüba lir.

Küm ka rara Palestine nung 42,000 dak tema tepseta Gaza tesem timba raksajaka iba takok ya monguteti lir.

Pua alirtem mechiok aser Hamas-i maneni rarar aser Israel sepaitema tepseter.

Sinwar tepsettsü ya Israel-i aginüa aliba takok liasü. Saka Netanyahu-i rara nung danga nukjidong tem tongtetogo ta mashi tashi maneni raratsü ta ashir.

Yahya Sinwar ya 1962 küm Gaza Strip kübok Khan Younis nung aliba refugee camp ka nung aso. Pa arishi küm pongu tanur asüdang 1967 Middle East rara nung Egypt nungi Israel-i apu.

1948 rara nung Israel sepaitemi Palestine nung 700,000 dak tema pei kidang nungi meindokba mesüra jena aoba rongnung par kibong ya dena liasü.

Pa arishi küm 20 shi asüdang Palestine nung ‘informers’ pezü tepset ta Israel-i aitsü. Pa tepuokdak küm 22 alidang Hebrew angazük, par tsükchir jangja metet aser parnok den raratsü angazük. Pa tepuokdak aliba mapang Israel-i pa indang dental records aser DNA sample agizüka lir, anungji parnoki pa tasü mang jangjatettsü.

Israel nung sepa'i Gilad Shalit melen 2011 küm Palestine nung tepuokdak alir nisung 1,000 dak tema chiokba nung Sinwar densema chiok.

Taoba küm October 7 nü Sinwar aser par teloki Israel nung 1,200 shi tepseter aika pua bener ao.

1990s nungi Israel-i Hamas lenir tepset shia temelener adoker. Sinwar tepsetba atema Israel benjongaka Hamas ket nung hostage 101 lir aser tang tashi parnoki rarar.



भारतीय प्रौद्योगिकी संस्थान खड़गपुर
INDIAN INSTITUTE OF TECHNOLOGY KHARAGPUR

Advt. No.: R/12/2024

Institute ajanga Safety Officer atema Indian senso nungi Online Application meshir.

Educational qualification, experience aser updates atema yangi angutsü:

<http://www.iitkgp.ac.in/non-teaching-positions>

CBC 21255/12/0011/2425

कुलसचिव/ Registrar

Somalia suicide bombing nung nisung 7 asü

Mogadishu, Mongputeni/Oct. 18 (Agencies): Takum bendanga agütsür bomb pokloktür kati Somalia yimtiba Mogadishu nung police training school tezülen café ka nung mejangjaba oset pokdaktsüba nung nisung tenet asü aser trok yiru.

Iba lendong nung police aser civilian tem asü, shirnok Brehostibarnü General Kaahiye Police Academy tezülen süngo jema liasü, ta police-i ashir.

“Iba lendong ya süngdongzüng nung atalok, kong nüburtem adenshia anisüngzükter,” ta police sangdong ka ajanga ashir.

Al-Qaeda den sendaktepa aliba Al-Shabab telungpur teloki iba lendong agütsüba tenüng agiogo. Iba telok yagi Somalia indang sorkar atsüngdoktsü meranga mitkar aser sorkar meyong institutions balala nung mapang shia amaker.

Yangji alir kati osangbener dang pai ola tulu adoka apokba angashi ta ashir. “Café sünga nisung adenshia süngo jemtepa liasü aser lendong atalokba

sülen rongrongshironga liasü,” ta pai ashir.

Bomb apokba sülen tekumzükter tem kanga kera aru, ta tenüng kuli alirtemi ashir.

Madina Hospital nung paramedic kati nisung aika yirur temang anepalutar ta ashir. “Onoki yirur alirtem anepalutsü meranger, aser aika kanga sashia yirur lir,” ta lai ashir.

August ita nunga Mogadishu nung nüburtemi amshiba tzükum ka amakba nung nisung 30 dak tema asü aser iba yongji al-Shabab anema longkak ait tenzuka liasü.

Sorkar ya yimsüsüba menden nung alitsü atema bendanger sepa'i dak kanga sashia metaloka alir. Parnok ya local armed groups tem den lungjemer African Union sepa'i aser United States indang tayimtsü teyari nung al-Shabab den rarar.

Tang Somalia nung security maparen nung bendanger sepaitem teyari agir, shirnok African Transition Mission kübok Somalia nung yoka lir aser December ita tembangtsü.

MDFA Trophy 2024 tasemnübuba asaya osang



MDFA Trophy 2024 tasemnübuba tanabuba asaya Eastern Wings aser Legendary Yeomanly Misfits tsüingda asayaba mapang tangokba noksa.

Mokokchung, October/Mongputeni 18(TYO): Tasemnübuba MDFA Trophy mezüingbuba asaya Super Seniors FC aser Zonipang SC tsüingda asayaba nung asaya tenzüker minute 45 buba tashi nung telok katia goal magütsüteti anisüingzükbapang agi.

Anisüingzükbapang agiritanaben ground-i aita asayabapang nung minute 55 buba nung Zonipang SC nungi J.no-10 Imnatoshi-i goal ka yok aser asaya aoba mapang minute 83 buba nung Super Seniors FC telok nungi Imnatoshi-i goal ka

yokteta telok ana kasasa sür iba asaya tembang. Telok ana takok ayima asayaba mapang minute 31 buba nung Temjenmeren (J.no-7) aser minute 90+2 nung Tangit (J.no-10) yellow card achi aser tenaprong Super Seniors FC telok nungi liasü.

Tanabuba asaya Eastern Wings aser Legendary Yeomanly Misfits (LYM) telok tsüingda asayaba nung asaya tenzüker minute 5 buba nung Eastern Wings telok nungi J.no-18 Nikom-i goal ka yoktet saka minute 11 buba nung LYM telok nungi J.no-7 Imchayanger-ia goal ka yokteta telok ana

kasasa akum. Iba sülen ano minute 20 buba nung Eastern Wings telok nungi J.no-18 Nikom-isa goal ka yok aser ano Eastern Wings telok nungisa J.no-10 Chemthong-ia goal ka yokteta Eastern Wings teloki goal 3-1 agi LYM telok koka liasü.

November 19, 2024 anogo asavatsüpur
10:00 AM - Amokmolu F.C V/s K.S.U.M
12:00 Noon - Team Gilgal V/s Moanungsang Memorial Sporting Club
2:00 PM - S.S.S V/s Zonipang SC

Jalukie nung kaketshir atema ananü saisapong sentong agi



Dimapur, Mongputeni/Oct. 18 (TYO): SVEEP Campaign 2024 nung shilem ka ama "Sports for Votes" omen nung ajemdaker Jalukie Town, Peren nung kaketshirtem atema saisapong sentong ka October 15 & 16, 2024 anogotem agia liasü.

Lanurtem nem electoral awareness agütsütsü aser lanur nem saisapong tsütsü parnok sempet sayudaktsütsü asoshi sapang agütsütsü aser electoral roll nung tenüing züluoktsü asoshi maongka agütsütsü nükjidong nung iba asayamung sentong ya ayongzüük.

Iba asayamung mezüing anogo GHSS Ground, Jalukie Town nung agia liasü, kong sentong akhumdong ama Additional Deputy Commissioner, Jalukie T.L.

Kiusumong Tikhir dena liasü. Pai kaketshirtem dang India indang constitution ajanga temeden aser maongka balala agütsüba indang ashi aser senso tajung ama sholem agütsü aser angazüütsü ajungshia liasü.

Iba mapang Assistant Election Officer (AEO) Peren, Aketo ajanga Peren district nung electoral roll indang nung electoral roll indang Special Summary Revision 2024 agütsü aliba indang metetdaksü aser temsüa aliba kaketshir ajunga dang maongka agia electoral roll nung tenüing züluoktsü ayongzüük.

Mezüing anogo nung tetsür aser tebur asoshi arü atsütepba, three-leg race aser sack race amala ayongzüük liasü. Tanünü buba nung ajaki kanga sapua aliba Futsal

tournament ya Ball park, Jalukie Town nung ayongzüük liasü.

Kaketshirtem ya tetsür-tebur atema team trok lemsa aser shilem agidakja par septem sayua toktepa liasü.

Iba asayamung tembangba sentong nung AEO Peren ajanga tepela o jembi aser iba sülen takok angur nem senpet, kulizüing kaket, jersey aser mementos agüja liasü.

Iba asayamung sentong nung GHSS Jalukie aser Barail Valley Hr. Sec. School nungi kaketshir 210 arua shilem agia liasü.

Asayamung sentong ya Chief Electoral Officer, Nagaland tawabangba kübok Office of District Election Officer, Peren aser Nagaland Sports Association ajanga ayongzüük liasü.

Denmark Open: PV Sindhu quarterfinals tongogo

Copenhagen, Mongputeni/Oct. 18 (Agencies): Anaben Olympic medal ngua alila India tsür PV Sindhu-i tetenzüklen junga masayatetaka tatem nung world number 7, China tsür Han Yue madak takok ngua Brehostibarnü Denmark Open Super 750 badminton tournament quarterfinals tongogo.

Taoba mapang world champion aser tang jenjang 18 buba nung alila Sindhu-i round tanabuba nung China tsür Han madak 18-21 21-12 21-16 agi takok angu, koba minute 63 asaya liasü.

Ibai May ita Malaysia Masters final nung Han madak takok anguba sülen tematiba jenjang 10 nung alir asayar madak lai mezüing takok anguba alitsü.

Iba takok yagi Sindhu o Han na ti ben ajurutepba nung lai tenetben aser Han-i khen

koka lir. 2015 küm iba asayamung nung final tongtetla Sindhu ya India nunger asayartem rongnungi la kija anünga lir, shibai Indonesia tsür Paris Olympic nung bronze medal angula Gregoria Mariska Tunjung mesüra Denmark tsür Mia Blichfeldt den quarterfinals asayatsü.

Malaysia nung final asayaba den külemi lai taküm French Open aser Spain Madrid Masters asayamung nung last eight tongteta lir.

Sindhu aser Tunjung na asayaba nung India tsürlai 10 ben aser Indonesia tsürlai anaben takok ngua lir, saka taküm tena khen danga asayadanga mali.

Arishi küm 24 tain Han yagi tesüsa Sindhu madak April ita Badminton Asia Championships nung takok ngua liasü.

St. Joseph's College, Jakhama nung EPIC tournament ayongzüük



Dimapur, Mongputeni/Oct. 18 (TYO): St. Joseph's College, Jakhama nung October 18, 2024 nü ananü atema EPIC tournament aser registration drive tenzüka liasü.

Iba sentong ya "Sports for Votes" omen nung ajemdaker Office of the Chief Electoral Officer (CEO) Nagaland ajanga Nagaland Sports Association den lungjemer ayongzüükba lir.

Sentong nung SDO (C)

Jakhama, Nockpai Konyak ajanga election maparen nung lanurtemi shilem agiba tajangzüük indang lemsatep aser registration drive nung shilem agütsü ajungshia liasü.

Pai kaketshirtem dang pei vote temeden amshitsü atema zükla malitsü ayongzüük.

Iba sentong ya October 19, 2024 nü tembangtsü, kong anogo tepiyong saisapong balala nung tetoktepa alitsü.

Cricket: India-i asemnü buba nung tajungba asaya

Bengaluru, Mongputeni/Oct. 18 (Agencies): Bengaluru nung New Zealand den mezüingbuba Test asayaba nung India nunger ya mezüing innings nung runs 46 dang yangluteter asayar ajunga out süa liasü, saka tasemnü buba nung 231-3 tonger anogo atem. New Zealand ya runs 125 agi timba lir.

Hokulbarnü asaya tembangdang Sarfaraz Khan ya runs 70 yangluteter liasü, shibai Virat Kohli den külemi runs 136 yanglu. Virat Kohli ya Hokulbarnü asoshi ball tatembangba aondang runs 70 yangluteter out asü.

Captain Rohit Sharma-i runs 52 yanglutet aser külem opener Yashasvi Jaiswal-ia runs 35 yangluteter lia Ajaz Patel-i tenaprong melentepa out sütsü.

New Zealand pur runs 402 yangluteter lia asayar ajunga out sütsü, aser iba mapang Rachin

Ravindra-i runs 134 yangluteta liasü. Mezüing innings nung New Zealand ya runs 356 agi timba liasü.

Arishi küm 24 tain Rachin ya runs 22 ngur lia Hokulbarnü asaya tenzüük aser pai fours 13 aser sixes pezü zükteta liasü.

Tim Southee-ia runs 65 yanglutet, kong fours pongu aser sixes pezü liasü.

Opener Devon Conway-i ball 105 nungi runs 91 ngutet.

India nunger bowler tem rongnung spinner Ravindra Jadeja aser Kuldeep Yadav nati wicket asem-sem agia liasü.

Saka wicketkeeper Rishabh Pant ya iba asaya tenzüker ananü buba nung temoko yirua tasemnü buba nung masaya.

December 2022 nung gari lendong tesashi ka nung temokok yirua küm ka dak tema masayatetba kasa temokok nung pa yirua liasü.

BILEMDANGANG
"Tesüingjem nisung ain adok tsüboang."